

## **Wosheetso P'awlos Shints Wosho K'orontos Ashuwots Maants Kindo**

P'awlos K'orontos dats ashuwotssh b̄ guut'ts shints wosho b̄ guut'e K'orontositse b̄ need'its Ik'i moowutse krstiyani beyonat imnetiyatse tuut teshts kic'oosh biitso daatsiyosh gawutni. Manoor K'orontos dats jamaatsik wotts Grik kitu bwottsi danmbaatse Akayiya eteets Rom datsatsi kitti enuni btesh. Kitman een wotts jaaki fino, matseets niwo, ayidek'at gawunoke teshts fini gondannat biitse haymanoti ayon daneeki btesh.

Woshetso b̄ t'iwints Ik'i moowwutse teshts kayeyaatsa, gond finets beyo, widonat de'eyi jangono, S'ayin shayiri imi jangonat k'irotsse tuwi janga b̄tesh, mank'owere woshetso doo shishiyi jangosh aatets keewanots kaatsdek't t'iwintsona b̄t'intsi.

«Shuno» Ik'o b̄ shuntswots ashuwotssh b̄ imts imuwotsitse bogo b̄wottok'owo kitsiru tatse keezl k'ot'o mas'afanitse ayidek't daneek wotts kayo b̄wotok'o daneke.

### **Jamon mas'aafan b̄detstso**

Kindo 1:1-9

Krstiyaniwotsitse tuuts kayewo 1:10—4:21

T'awu gondtsi wotonat meyitsi ash beyon 5:1—7:40

Krstiyaaniwotsnat krstiyaniyots amantsman de'awwotnsn 8:1—11:1

Ik'i meyitsi beyonat Ik' ik'iyi niwon 11:2—14:40

Krstosnat amantsuwotnsn k'irotsse tuwo 15:1-58

Yhuditse fa'a kic'ts krstiyaniwotssh tep'o 16:1-4

## Gúúpo 16:5-24

<sup>1</sup> Ik' shunon Iyesus Krstossh wosheets wotosh s'eegetso P'awlosnat no eshu Sostensokere.

<sup>2</sup> K'orontos kitotse fa'a Ik' moosh, biyitsnowere Iyesus Krstosn S'ayin wotts S'ayin bowotish s'eegetswotssh, mankowero bo be beyoke, bonat nonsh Doonz wottso no Doonz Iyesus Krstos shúútso s'eegiru jamwotssh.

<sup>3</sup> No nihi Ik'onat Doonzo Iyesus Krstosokere s'aatonat jeenon itsh wotowe.

### *Ik' údo*

<sup>4</sup> Iyesus Krstosnton s'aato itsh imetsosh it jangosh jam aawo Ik'o údituwe. <sup>5</sup> Jam keewon, noon keewon wotowa danon Krstosn gaalwutserte. <sup>6</sup> Krstos jangosh itsh t keewts gawo itokere kúp'ere. <sup>7</sup> Eshe no Doonz Iyesus Krstos be'ewo koton nobefere kon naari shayiri imo itsh shapratse, <sup>8</sup> No doonz Iyesus Krstos aani woor eeg eeg deshawwotsi wotar nodatsetwok'o bí s'uwoosh b́ borfetsosh kup'ar it beetuewk'o woshúwe. <sup>9</sup> B́ naay no Doonz Iyesus Krstosnton ikwoto itdetsetuwok'o itn s'eegtso Ik'o amaneke.

### *Krstiyaniwots dagotse k'alewo bgeyirawok'o*

<sup>10</sup> Ti eshuwotso! «K'alewo it dagotse b́ be-rawok'o, it jamets shiyeyar ik níbonat ik s'iil s'iilon kup'ar beewere,» etaat no Doonz Iyesus Krstos shúútson itn k'oniruwe. <sup>11</sup> T eshuwotso! it dagotse fayó b́ beyiruwok'o K'elo'e maa ashuwotsoke shishre. <sup>12</sup> Manuwere it itok tookon «Taa P'awlosk taane, taa Ap'losk

taane, taa P'et'rosk taane, taa Krstosk taane» it etiri. <sup>13</sup> Bére Krstos kayera? P'awlos itsh jüitera? Himó it gupe P'awlos shútsoneya? <sup>14</sup> Taa K'ersp'osnat Gayyosiyere okoon ititsere konnoru t gufawotse Ik'o údituwe. <sup>15</sup> Eshe «Taan P'awlos shútson guuperte» err keewosh falituwo aaliye. [ <sup>16</sup> Arikee, Ist'ifanos maa ashuwotsi gupre, maniyere okoon k'osho taa t gupts asho b bewok'o gawratse.] <sup>17</sup> Krstos taan bwosh doo shishi keewo t danituwok'owa bako t gupishaliye, Krstos jüito\* hank'on b oorerawok'o doo shishi keewan tdanir ashoke daatsets dani telfi noon keewok'onaliye.

*Krstos Ik' danitefonat angó b woto*

<sup>18</sup> B jiti keewo t'afit ashuwotssh darok'owe b taaweti, noosh kashituwotsshomó Ik' angee.

<sup>19</sup> «Dani telefetswots dano t'afituwe,  
Dani telefetswots danono ok k'aaú baze-  
tuwe» ett guut'ere.

<sup>20</sup> Eshe dantso aawoke b fa'oni? Nem daniru-wonu aawoke b fa'oni? Danosh geyiruwonu aawoke b fa'oni? Ik'o datsanatsi dani telefo eegoru bitse dandeshawok'o woshk'rerosha?

<sup>21</sup> Datsnatsi ashuwots bo took danitefon Ik'o danosh bo falawok'o Ik'o b danon boats is'k'rere, ernmó dárok'o taaweyiru no nodaniru doo shishiy keewon amanituwots bo kashituwok'o Ik' shún wotere. <sup>22</sup> Ayihudiyots adits keewo bek'oshe bo geefoni, Girik ashuwotswere danitelefe bogefoni. <sup>23</sup> Noomó

---

**1:14** 1:14 Wosh. 18:8; 19:29; Rom 16:23    **1:16** 1:16 1 K'or. 16:15    \* **1:17** 1:17 Jüita: Eteetso mask'aliyoniye.    **1:19** 1:19 Isa. 29:14    **1:20** 1:20 Iyo. 12:17; Isa. 19:12; 33:18; 44:25

Krstos noosh b́ jitetsok'oniye no daniri, Hanuwere ayhuidiyotssh t'uge, Grik ashuwotssh dáree. <sup>24</sup> S'eegetswotsshomó ayhuidiyotssh wotowa Grik ashuwotssh, Krstos Ik' angonat Ik' danitelefe. <sup>25</sup> Ik' dára ett gaweyiru keewo ash danitefoniyere bogfe, Ik'o maawa ett gaweyiru keewo ash kup'oniyere bogfe.

<sup>26</sup> T eshuwotso! Ik'o itn b́ s'eegor awuk'o ash it wottok'o aab gawde'ere, ash gaawiru-wok'on it dagotse aywots daanetsuwots wee kúp'uwots wee een een ashuwots aalne. <sup>27</sup> Ik'o dantelfetswotsi jitsiyosh datsanatse dartsok'o taawets ashuwotsi b́ marat'i, kúp'uwotsi jitsiyosh datsatse maawtsok'o taawetswotsi b́ marat'i, <sup>28</sup> Ik'o datsatsi ashuwotsoke fa'ane ett be'eyiru keewwotsi bo berawok'o woshosh datsanatse dash antsonat gac'ets k'awnts deshaw keewo b́ marat'i. <sup>29</sup> Hanowere bk'al konwor asho Ik' shinatse b́ tooko dambaan b́deshawok'owe. <sup>30</sup> Itnomó Ik'o Iyesus Krstosnton ik woto it detsetwok'o b́ woshi, mansh Ik'o Iyesus Krstosn noko danitelefo b́íne, noosh noko kááwo b́íne, no s'ayinonat no b́ín nofaritwok'o b́ woshi. <sup>31</sup> Eshe mas'aafotse guut'etsok'on «It'etuwo b́ beyal Ik'on id'ee.»

## 2

### *Jitseto Krstos jango daniyo*

<sup>1</sup> Ti eshuwotso! taa itok twoor Ik' jango itsh t gawutso,\* keew falonat bog dan kitsonaliye.

---

**1:31** 1:31 Erm. 9:24 \* **2:1** 2:1T gawutso: Ik ik brani mas'afwotsitsere «Ik' keewo kishde'er daniya bo etfo.»

<sup>2</sup> Itnton t beyor Iyesus Krstosiyere oko dab jitats jiteyat b́ k'ironiyere k'osho eegoru tdanawok'osh k'ut'dek'atniye t teshi. <sup>3</sup> Eshe itnton t beyor maawk wotat shatonat ay k'eewone tteshi. <sup>4</sup> T noon keewonat nabo ash danitefonat noon keew shawshats b́ woterawo Ik' shayiri angaats tep'ekee b́teshi. <sup>5</sup> Hanowere tk'altso it imnetiyo ash danitelefats b́ woterawo ik' angaats te'ek b́ wotishee.

### *Ik' dani telefo*

<sup>6</sup> Ernmó bo shayiri beyon katsuwootssh dantelefi aap'o keewituwone, wotowa eree nokeewitwo datsanatsi danitefon wee s'uwatse t'afosh wotit datsan k'eeziruwootssh danitefoniyaaliye. <sup>7</sup> No no keewiruwootssh Ik'o yoots dúroniye shinon no mangosh b́ k'anitsonat aashat teshts Ik' danitefoniye. <sup>8</sup> Datsni k'eziruwootssh danitelefo dantso konworu aaliye, danfno wotik'ee mang wotts Doonzo jirawuk'ne b́ tshi. <sup>9</sup> Wotowa eree mas'aafo,

«Ash ááw be'awo,

Ash waaz shiyawo,

Ash nib gawawo,

Ik'o b́ shúntswotssh k'anire» etfe.

<sup>10</sup> Nooshmó Ik'o b́ shayiron aashts man kitsre, Ik' shayiro dashan wokts Ik'oke aashtsonoru b́ oreraniyere jam keewo p'ec'at b́ s'iili. <sup>11</sup> Ash iko jangosh b́ took shayironiyere okoon b́ gawiruwo dantso kone? mank'o Ik' shayironiyere okoon Ik' gawiruwo dantso konuworu aaliye. <sup>12</sup> Ik'oke

noosh b́ imets keewo nodanish Ik' shayira bako datsanatsi shayiro de'atsone.

<sup>13</sup> Eshe no shayiri keewo shayiron wotts ashuwotssh no danir ashokere daatsets danitefon b́ woterawo Ik' shayirokere daatsets dantelefone. <sup>14</sup> Ik' shayiro deshaw meets ashonmó Ik' shayiroke imeyiru imo dek'osh falatse, bí im eenonuwere p'ec'ar b́s'ilet Ik' shayiron b́wottotse t'iwints dek'osh falatse, hanuwere b́ish darok'owe woshder b́ s'ileti. <sup>15</sup> Ik' shayir detsts jamonmó jam keewo p'ec'ar s'iilo falituwe, b́ took keewonomó konuwor p'ec'ar s'iilo falatse.

<sup>16</sup> Hanu,

«Doono gawiruwo kone danosh faliti?

B́ish izosh falituwo kone?» Ett  
guut'etsok'one.

Noomó Krstos nibo detsfone.

### 3

#### *Ik'o guutswotsi*

<sup>1</sup> T eshuwotso! taa iti t daniyor meets asho Krstosats kúp'eraw na'i marmat'ok'o it wottsok'ona bako shayiretswotsk'o it wottosohaliye. <sup>2</sup> Kúp' mish moo máá falaaw na'i marmat'ok'o it wottotse taa itsh t maanztso ezaa bako kúp' mishaliye, andoor b́ wotiyal kúp' mish moo falrafa'ate. <sup>3</sup> It andoru meets ash itne, it ats atseyo it okoreyirwotsnat it mosheyirwotse meets ash itnosha? it finirwore k'osh ashok'owosha? <sup>4</sup> Iko «Taa P'awlosk taane» k'osho «Taa Ap'losk taane» bí etor datsanatsi ash

itnoshá? <sup>5</sup> wotowa bako Ap'los kone? P'awlos kone? boowere it itk'alirwok'o k'alts guutsne, botook tookon bo finir Doonzo botook tookon boosh b́ eezts finoniye, <sup>6</sup> Taa ttookí, Ap'los aatso b́ ishi, eenshtsonmó Ik'oniye. <sup>7</sup> Eshe bos'man enshtso Ik'oni bako tooktsonu aats ishirwonu eegnaliye. <sup>8</sup> Tooktso wotowa aats ishtsonu taalne, bo took tookon bofintsok'o bo k'awntso dek'etune. <sup>9</sup> No Ik'osh tohar finit guutswots noone, itmó Ik' goshonat Ik' agiru maa itne. <sup>10</sup> Ik' taash b́imts s'aatok'on maa agiru s'ekok'o agoko need'itdek'i, koshonu taa need'itsmanats bíagi, ernmó ik iko manats awuk'o bíagiruwok'o t'iwintso b́ish geyife. <sup>11</sup> Ikn ned'yetsmantserere okoon konuworu k'osho ned'iyosh falatse, need'yokanwere Iyesus Krstosiye. <sup>12</sup> Ned'okanats awntson, wee ambaron wee k'awunts shaaw shúútson, mitoon, tootson wee buyon agetuwo b́beyal <sup>13</sup> ik ik asho b́ fino b́be'et angshiy aawo weetuwe, manots aaw ik ik asho b́ fino awuk'o b́ wotok'o tawon fadere be'etuwe. <sup>14</sup> Gmbi agf iko bíagtso tawon b́fadeyor mic'aniyere b́ oriyal b́ k'awntso daatsituwe. <sup>15</sup> B́ fino tawon mic'r t'afitu agtsonmó t'ut'etuwe, wotoa eree bí b́tookon tawotse beshat mic'aniyere oorts ashok'o kashituwe.

<sup>16</sup> Ik' maa it wottsok'onat Ik' shayiro ititse b́ beyiruwok'o danatsteya? <sup>17</sup> Eshe asho Ik' moo b́ gakal Ik'o b́ín gaketuwe, Ik' mooniye S'ayine, Ik' maa S'aynwtswere itne.

<sup>18</sup> Konworu b́ tooko ant'elck'aye, datsanatse danitelefetso araar be'etwo fa'e wotiyal Ik'oki

arik wottso danitelefo b́datsish b́ tooko dartsok'o taawwe. <sup>19</sup> Datsatsi danitelefo Ik' shinatse dáree, hanu, «Ik'o dani telefetswotsi bogond finon detsetwe» ett guut'etsok'one. <sup>20</sup> Hank'owere, «Doonzo dani telefetsuwots asaabiyo k'awuntso b́deshawok'o danfee» ettso guut'ere.

<sup>21</sup> Eshe jam keewo itk b́wottsetse konworu ashon it'k'aye. <sup>22</sup> P'awlosi wotowa, Ap'losi b́ wotowa, P'et'rosi wotowa, Datsan wotowa, kasho wotowa, k'iro wotowa, and beyiruwo wotowa, shuuts wetuwo wotowa, jámonwor itkee. <sup>23</sup> Itmó Krstos nanaúwots itne, Krstoswere Ik' na'ee.

## 4

### *Krstos guutswots*

<sup>1</sup> Eshe ash jámo noon Krstos guutswotsi nowottok'o Ik'oke aashtso kitso adaro boosh imetswotsk'o woshde noon taawwe. <sup>2</sup> Adar dek'tswotswere amanetswotsi wotar daatsewo boosh geyife. <sup>3</sup> T jangosh b́wotitka wotiyal itwoor tiyats itangshiyal wee k'osh asho tiyats b́angshiyal eegonor kic'eratse, arikon taawor dab ttookats angsho falatse. <sup>4</sup> Taa tdantsok'oyi wotiyal tnibo taan gac'eratse, hanuwere taa s'ayin twottok'owo kitsratse, ernmó tiyats angshituwo doonzo s'uziye. <sup>5</sup> Mansh b́aawo b́ borawo, doonzo angshosh b́waftseere shino konator angshk'ayere, b́ b́woor t'aluwotse áashtso mist'iriyo shanomaants kishituwe, ashuwots nibotse áashts hasabiyo kishituwe, manoor ik ikon Ik'oke b́ish wotit údono daatsituwe.



<sup>6</sup> Eshuwwotso! iti t'ak'amosha etaat keewanats taanat Ap'losi aridek'at tkeewi, hanowere tk'al «Guut'etsatse beshk'aye» etiru izi biitso no atse it danetuwok'wa etaatniye, mansh ash ikon it'o k'oshonowere gac'o geyiratse itsha. <sup>7</sup> Nee k'oshuwotsiyere eegneya nbogi? K'oshoke nde'aw keewo eebi fa'oni? Eshe jam keewo k'oshoke ndek'ka wotiyal de'aw ashok'o eegoshe n it'iri.?

<sup>8</sup> Andere itsh geyiru keew jamo daatsrte, andere galetswotsi wotertee, no atse k'aleyat naashwtserte, arikon it naashka wotink'ere, noowere itnton toowar nonaashitwotse it naashonuwere sheenge b'wotiyank'oni, <sup>9</sup> Ik'o noon b'woshtswotsi k'iro boatsats angshr bo úd'etuwoki beewok de'amet ashuwotsitse shutstsuwotsi noon b'wooshtsok'o arefee, manatse tuutso dats jamatse melakiwotsnat ashuwots shinatse miis'i mit wotatniye nobe'eyiri, <sup>10</sup> Noo Krstos jangosha etaat dogwotsi woterone, itmó Krstosn ayidek'at dantsuwotsi wotwutserte, mank'owere noo mawtswotsi woterone, itmó kup'uwotsi woterte, it mangiyeyirwotsi woterte, noomó keteyeyiruwotsi woterone. <sup>11</sup> And b' wotiyaluru and sa'atansh b' borfetso nok'ak'iri, no shashúwiri, no aratsiri, no jot'eyiri beyoko t'út'at hake bako nojawriri. <sup>12</sup> No kishon finat ango nomaawiri, noon bo c'ashor noderiri, noon bo gishor no k'amiri, <sup>13</sup> noon boc'ashonat noshútso bot'afiyor maac' nefon boosh no aaniri, andish b' borfetso datsanatse juwetsok'onat datsatse

fokets kímó woterone.

<sup>14</sup> Taa han itsh tguut'ir shuneets tnana'úwotsk'o woshdek'at izosh gawatni bako iti jiitsiyo geyatniyaliyee. <sup>15</sup> Krstosn jishiru ayuwotsi it detsalor nih ayuwotsi deshatste, taayere itn Iyesus Krstos doo shishiyon shuure. <sup>16</sup> Mansh tjafro sha'ar taan it arituwok'o iti k'oniruwe. <sup>17</sup> Hanatse tuutson shuneetsonat amanets doonzon t naayi wottso T'imotiyosi itsh woshere, b́ be beyokenowere Ik'i maa mooke t daniyirwok'o bí taa Krstosn t daatsts handr beyon b́n it jishetuwo itsh gawituwe.

<sup>18</sup> Ernmó ititse ik ikuwots taa itn s'iilo twarawok'o boosh bí arere kofangon s'eenwtserne. <sup>19</sup> Ernmó doonzon tooh karn aawotse itok weetuwe, manoor kofangirwanots bo noon keew s'uzi b́woterawo bokúp' kúp'onor dano geefe. <sup>20</sup> Ik'i mengsto noon keewi kis' b́ woterawo Ik'i kúp'e. <sup>21</sup> It geyirwo eebi? Sezi gumbo de'er it maants twoo geeftée? Himo shunonat tooko dashan detsi shayiron twoone it geyi?

## 5

### *Amantsuwotsitse finets gond fino*

<sup>1</sup> Ititse jitsits widi fino b́beyok'o keeweyiruwe, han naari widi fino dab Ik'i ash woterawwotsoke k'alekaliye, manuwere b́ nih máátsu máátsok'o woshdek't beyiruwo fa'ee eteefe. <sup>2</sup> Eshe, hank'o jitsits keewo ititse b́ befere eegoshe bognone etaat it míshiri? Maniyere dab keewanatse tuutso shiyano itsh geyiratsa? Han naari fino

fints asho ititse kishuwere. <sup>3</sup> Taa meetson dab itnton woto tk'azalor shayiron itntoniye tfa'oni, ar itnton theyiruk'o wotde'er han naari fino k'alts ashaats Doonzo Iyesus shúútson angshuwere, <sup>4</sup> It kakwewor taawere nodoonz Iyesus angon it dagotse shayiron tdaatsetuwotse, <sup>5</sup> Morron s'eents ashaan meetso b́ gáhituwok'o Shed'anosh imo itsh geyiyank'ee. Han it k'alitwere doonzo Iyesus angshosh b́weyi aawots ashaan kashu bkashituwok'wee.

<sup>6</sup> Eshe it it'o shengaliye, boot' shash múk'naú boot' jamo b́ shashituwok'o danatsteya? <sup>7</sup> And it wotts jamok'o boot' shasho bítse deshaw handr boot'ok'o it wotish boot'i nato ok juuk'rore, nofazigi mereer wottso Krstos shukeere, <sup>8</sup> Mansh gondonat gondon s'eents boot'i shashon b́woterawo boot' shasho bítse deshaw kaawonat ari tushon nobaaliyo mangiwone.

<sup>9</sup> Haniyere shin itsh tguut'ts woshatse gobetswotsnton ik wotk'ayere etrebteshi. <sup>10</sup> Han tietoorowere b́ jamon datsanatsi gobetsuwotsatse wee jaalets ashuwotsatse wee úmp'etswotsatse wee woteraw Ik'o ik'iyrwotston iko wotk'ayere etaliye, mank'o b́wotink'ere datsuatse kesho itsh geyife etee. <sup>11</sup> Taayere itsh tguut' krstiyaniyotsi etefere wido sha'iruwotsnton, k'awntiruwotsnton, Woteraw Ik'o ik'iruwotsnton, wee ash shúúts t'afiruwotsnton, wee mashiruwotsnton, wee biik'iruwotsnton ik wotk'ayere etniye. Hanotsk'o ashuwotsnton towaar maak'ayere. <sup>12</sup> Krstiyaniwots mabariyoniyere úre fa'a ashuwotsats angshosh kone taa? Krstiyaniwots

mabariyatse fa'úwotsatsnmó itwoor angsho faliyalkitneya? <sup>13</sup> Úratse fa'a ashuwots jango angshituwo Ik'oniye, eshe mas'aafo bíetiruwok'on «Gond asho ititse kishuwere.»

## 6

*Krstiyaniwots dagotse fa'a fayó awuk'on baziyetuwok'o*

<sup>1</sup> Ititsere iko bí eshu amantsonton b́ fayeyal b́ keewman amantsuwots angshon b́sh bo s'iiletwok'o b́ k'alonyere s'amiyosh Ik' ash woteraw angshiruwots shinats daamosh ááweya b́ shúk'eti? <sup>2</sup> Ik' ashuwots datsatsi ashaats bo angshituwok'o danatsteya? eshe, datsanatse angshiruwots it wotor keew muk'anats angshosh maawituteya? <sup>3</sup> Melakiwotsats dab it angshitwok'o danatsteya? eshe, datsanatsi keewwotsats bogshde aawuk'oneya angsho nomaawiti? <sup>4</sup> Eshe it took tookon it fayeyal krstyaniwots ik mabariyoniye úratsi gac'ets ashuwots shinats bokeewman aawuk'oneya it t'intsituteya? <sup>5</sup> Hano tíetir it jitsituwok'owa etaatniye, wotowa ére eshuwotsitserere angsh falitu dants eenasho datseyalkeya? <sup>6</sup> Eshe, ik krstyaniyo k'osh krstyaniyo s'amir Ik' ashwoterawwotsok angshi moots daamo geyiyituwa?

<sup>7</sup> Eshe it took tookon s'amiyeyar mooshewo b́tookon itsh it took keetiye, maniyere iti dadewo k'aneratsa? mank'o iti dirshewo k'aneratsa? <sup>8</sup> Itmó it eshuwotsi wotts krstyaniwotsnoor dadaat itdirshiri. <sup>9</sup> Eshe weergondetswots Ik'i mengsto bonaarawok'o danftooshna? Kee-whan jangatsno daand k'ayere, gusiyetswots,

wee woteraw Ik'o ik'iruwots, wee gobetsuwots, wee gad'ayirwots, <sup>10</sup> Wee úmp'etswots, wee jaaletswots, wee máshetsuwots, wee ash shúúts t'afifuwots, wee biik'tswots Ik'i mengsto naarat-sno. <sup>11</sup> Ititsnor ik ikuwots mank'o itne b'teshi, andmó Doonzo Iyesus Krstos shútsonat noko Izar Izewer shayiron morrotse mash bazrte, Ik'osh gaalets S'ayin ashuwotsi wotat, kááwerte.

*Atsi meetso Ik'o mangosh jitso b geyitsok'o*

<sup>12</sup> «Jam keewo taash baziyeratse,» ernmó jamkeewo taash t'ak'amituwe etaliye, jam keewo taash baziyeratse, wotowa ére keew jamosh guuts wotarr kéweratse, <sup>13</sup> «Misho maac'osha, maac'onwere mishooshe,» bere Ik'o, mishon-owere, maac'onowere t'afituwe, ernmó no atso Doonzo Iyesussh, Doonzo Iyesuswere no at-sosh b'wottstotse noatso widosh wosho geyiratse. <sup>14</sup> Ik'o Doonzo Iyesusi k'ivotse tuuzre, nonowere bíangon k'ivotse tuuzituwe. <sup>15</sup> It atso Krstos atsi k'at' b' wottsok'o danatsteya? Eshe Krstos aatsi kayo de'er gobets maatsu aatsi kayo b' wotituwok'o wosho taash geyifa? B' jamon woteratse! <sup>16</sup> Máátsok gobo amr binton k'etuwo bínton ik atso bo wotituwok'o danatsteya? «Gituwots ik atse bo wotiti» ett guut'ere. <sup>17</sup> Doonzo Iyesusnton ik wotit ashonmó bínton shayiron ik wotituwe.

<sup>18</sup> Mansh widatse wokoore, asho b'finiru k'osh morr jamo b'took atsoniyere okoone b' finiri wid amiru ashonmó b' took aatsatse morro b'finiri, <sup>19</sup> It atso Ik'oke it dek'tsonat ititse beyiru S'ayin

shayirosh Ik' maa b wotok'o danatsteya? Eshe it Ik'k itna bako it tokik itnaliye. <sup>20</sup> Bíwere itn k'awuntson keewere, mansh it aatson Ik'o mangiwere.

## 7

### *Amantsuwots de'eyi jagosh izets izo*

<sup>1</sup> Taash guut'at it attso, asho máátsonton gonkewo bk'azink'ere shege. <sup>2</sup> Ernmó widatse wokoosh nungush ik iko b took máátso de'e, mááts ik ikunu b took kenihosh máátso amiye. <sup>3</sup> Keniho b máátsush k'alo bín geyitu de'eyi niwo bish bazik'aye, mank'o máátsu bkenihsh k'alo bish geyit de'eyi niwo bish bazik'ayiye. <sup>4</sup> Máátsu bi atsatse alo deshatsane, biatsatse alo detstso b kenihye. Mank'owere kenihó bíatsatse alo deshate, bí atsatse alo detstsu máátsuniye. <sup>5</sup> Kup'ar Ik' k'onosh it gitets ik wotde manorush bwotiyala bako k'aleyón iko ikosh de'eyi niwo bazik'aye. Manatse tuutson it tooko kordek'o maawr it eree shed'ano it ats fadewo bdoorawok'o aani towaar wotoore. <sup>6</sup> Han itsh tietir izook'owa bako tzaziyok'owaliye. <sup>7</sup> Ash jamo tikok'o máátso bde'aawo bbeyink'ere shunfee bteshi, ernmó Ik'o ik ikosh k'osh k'osh imo imre, iko ik naari imo, k'oshnuwere k'osh imo detsfe.

<sup>8</sup> De'erawwotsnat bokenih k'irts máátswotssh tietetuwo hank'oyiye, bode'erawo tikok'o wotarr bobeyink'ere sheenge. <sup>9</sup> Ernmó meetsi tewnon mis'oniyere de'ewo bk'antsotse botoko kordek'o bomawiyal de'ewne.

<sup>10</sup> De'etsuwotsshmó t'imet tzaziyo haniye, tzaziyanwere Doonzoka bako tikaliye, dek'ets máátsu bkenihatse fakshek'ayiye. <sup>11</sup> B faksheeyaloweré máátso amaniyere bíyal beewiye, wee bkenihnton maneewiye, mank'oweré kenihó b'máátsu fakshk'aye.

<sup>12</sup> K'oshuwotsshmó doonzo b'woterawo taa ttookon t'etiruwo hank'owiye, krstiyani ash iko krstiyani woteraw máátsu b'detsal err towaar beyo bgeyiyal fakshk'aye. <sup>13</sup> Krstiyani wotts máátsu krstiyani woteraw kenihodetsfawotiyal binton towaar beyo bgeyiyal keshk'ayiye.

<sup>14</sup> Krstiyani woteraw kenihó krstiyani wotts b'máátsu atse tuutson Ik'i jir wotituwe, krstiyani woteraw máátsunwere krstiyani wotts kenihoatse tuutson Ik'i jir wotituwane, mank'o wotobk'azink'ere it nana'úwots Ik'i ashuwotsi wotofalrawnk'nee, mank'oon it beyalmó it nana'úwots Ik'i ashuwotsiye. <sup>15</sup> Krstiyani woterawo faksheewo bgeyiyal faksheewe, mank'onmó krstiyaniwo mantstso kenihi wotowa máátso eegi naari keewon detseratse. Ik'o noon b's'eeg jeenon nobetuwok'owe. <sup>16</sup> Nee krstiyani máátsune, krstiyani woterawo nkenihi daneraka nworitka wotiyal eege ndani? Neewere krstiyani nungushono, krstiyani woteraw nmáátsu nworitka wotiyal eege ndani?

*Ik'o b s'eegor boteshtsok'on kúp'o bgeyituwok'o*

<sup>17</sup> Ik iko Doonzo b imts imok'onat b s'eegeori bteshtsok'on beewe, Ik'i moowwotssh ti imtso bín bojisheetuwo haniye. <sup>18</sup> Asho konuwor

wotowa gofo bíamiyak s'eegeka wotiyal gofo amawok'o wotosh gawuk'aye, gofo bíamawo s'eegeka wotiyalo gofamo geek'aye. <sup>19</sup> Gof amonu gof amk'azonuwere k'awuntso deshatsé, Ik'o tzaziyo korde'er finats jitsoniye k'awtsetsoni. <sup>20</sup> Mansh ashó ik ikon Ik'o bín b́ s'eegor b́teshtsok'on beewe. <sup>21</sup> Ik'o neen b́ s'eegor guutse nteshi? Nwotiyalor eegor woteratse, mansh kic'k'aye, nas' keshi goo ndatsitka wotiyal goo man neesh beshk'aye. <sup>22</sup> Guuts wotat b́befere Doonzon s'eegets ashó Doonzon nas' keshke, mank'owere nas'o wotat b́befere s'eegets ashó Krstossh guutse. <sup>23</sup> Ik'o k'awuntson iti b́kewutsotse ashuwots guutso wotk'ayere. <sup>24</sup> Mansh tíeeshwotso ashó ik ikon b́ seegeyori b́teshtsok'on Ik'onton mank'oon beewe.

*De'erawwotsnat bokenih k'irts máátswots jangosh t'intsets aato*

<sup>25</sup> De'eraw ashuwots jangosh Doonzoke tdek'ts tzaziyo deshatsé, ernmó doonzo mhretyon amanek twottotse ttook asaabiyo hanats dabr tt'intsitwoniye.

<sup>26</sup> And nobeyiru gizéyo kic'its gize b́wottotse de'eraniye bíyal beyo sheeng arefee taasha, <sup>27</sup> B́woteferowere máátso dek'ri wotiyal faksho geek'aye, máátso de'atsne wotiyal dek'osh geek'aye. <sup>28</sup> Ern mó nee máátso ndek'al niats morro wotituwe etaliye, mank'owere baarna'a iku máátso bíamal morro bi ats wotituwe etaliye, wotowa ére de'eyiru ashuwotsi datsanatsi beyi kic'o ayide boon daatsituwe, ttewunonuwere kic'anitse itkashitwok'owe.



<sup>29</sup> Ti eshuwotso! taa itsh tietirwo hank'oyiye, dúronúwo k'awnwtsere, haniyak eshe mááts detstswots mááts deshawok'o wotaarr beewne. Mááts detstswots deshawok'o wotarr beewne.

<sup>30</sup> Shiyanirwonwere shiyaanerawwotsk'o, geneeúwirwots geneeúwerawwotskok'o wotde'er beewunee, k'ac' keewirwots, k'ac' iko deshawwotsk'ok'o woshde'er boatso taawunee.

<sup>31</sup> Datsanatsi gaalon kis' keshiru jamwots bín kis' keyawok'o wotde'er beewunee, andi be'eyiru datsan beshitke.

<sup>32</sup> Mansh konnari hasabiyon it kic'eraawon it beyo shunfee, mááts de'awu asho doonzo b́geneeúshit keewo b́geyiruwotse b́asabiyo b́ t'iwintsit doonzosh s'iilit finatse. <sup>33</sup> Mááts dek'ts asho b́asabiruwu datsan keewonat b́máátsú b́n b́geneeúshit keewe. <sup>34</sup> Manatse tuutson b́asabiyo gitok kaywutsere etee. Mank'o mááts amaaw máátsu wee baarnaú bmeetsonat bshayiron S'ayinr doonzok woto bgeyituwotse bi asaabiyo b́t'iwintsit doonzo s'ilits finatse, mááts amts máátsunmó bkenihi máác'o k'eezosh bgeyiruwotse bgawir datsatsi keewe.

<sup>35</sup> Taa han itsh tietiru kamboots kindr it kic'ituwok'owa etaatniyaliye itsh b́ sheengetuwok'owa etaatniye, t tewunonuwere it niwon beyarr it asaabiyo b́ bad'erawo nibi s'eenon doonzosh itfinituwok'owe.

<sup>36</sup> Ik asho b́ wid'tsu dek' k'azosh b́ k'ut'iyakon mank'o b́ k'alo na'a mansh sheeng wot b́ k'azok'o b́sh b́shiyeyal, maniyere okoon bin dek'o b́ geyiyal, b́ deek'onu ar b́sh bíariyal b́ tewuntsok'on b́ dek'al morro woteratse, eshe dee'ewune. <sup>37</sup> Ernmó ik asho b́ nibo b́ kúp'iyal,

ǃ dek'etuwok'o bín woshit keewo aali wotiyal, ǃ tewuno kordeketuwe wotiyal, ǃ wid'tsu dek' k'azosh ǃ k'ut'iyal sheenge ǃ k'ali. <sup>38</sup> Eshe mááts dek'etuwo sheenge ǃk'ali, mááts de'awonmó bogshdek't sheenge ǃ k'ali.

<sup>39</sup> Máátsu b kenihí kashon ǃ befetsosh de'eyi nemon tipekiye, b kenihí ǃ k'iriyalomó b shúntsosh amoosh falfane, bi amet asho amants woto geyife.

<sup>40</sup> T s'ilok'onomó máátso amaniyere biyal b beyink'e k'anefe, geene'arniye b beeti, taa Ik' shayiro t detstsok'o arefee.

## 8

### *Woteraw Ik'osh shukeets meetsi jango*

<sup>1</sup> Woteraw ik'osh shukeets meetsi janga wotiyalo arikee «No jametswor dano detsfone» ǃwoteferor dano ashe bogtane etee ǃdofoni, shunonmó age bíagfoni. <sup>2</sup> «Dano detsfe» ett gawiru asho fa'ewotiyal bish dan geyiitowok'o andoor danafa'ee. <sup>3</sup> Ik' shunts ashonmó Ik'oke daneke ǃwotiti.

<sup>4</sup> Mansh woteraw ik'osh shukeets meetso meyi jango ǃwotiyalo, woteraw Ik'o kasho deshaw ǃwottsosh Ik' ikoniyere okoniye k'osho Izar Izewer bíaalok'owo danfone. <sup>5</sup> Dab Izar Izeweri ǃwoterawo Izar izewerotsi ett s'eegeyirwots ayuwots Izar izewerotsnat ay doonzuwots daronat datsatse fa'ane eteyalor, <sup>6</sup> Noko Izar Izewermó jam keewo aztsonat noowere bíko no wottsuwots Ik'o niho ǃs'uziye, mank'owere jamkeewo bín

azetsonat noowere bín nobeyirwo Doonz iko Iyesus Krstos s'uziye.

<sup>7</sup> Ernmó han dan jametswotsiyaliye, ik ikuwots han bborfetsosh woteraw Ik'o ik'iyo bo doyo wosh bodek'tsotse meestso bomeyir woteraw ik'osh shuketsok'o woshdek'tniye, mansh bo asaabiyo maawk b'wottsosh bokiimiri. <sup>8</sup> Bwotiyalor Ik'ok noon t'intsituwo mooniyaliye, moonok'azalor noosh shapit keewo aaliye, nomaalor noosh oot'et keew aaliye.

<sup>9</sup> Wotowa ére nas' it keshtsan imnetiyon kup'eraw ashuwotssh t'ug b' woterawok'o it atso korde'ere. <sup>10</sup> «Dano detsfe» err woshosh shúketso wosh shukeyiruwoke nmaafere b' imnetiyon kúp'eraw asho neen b' bek'al n fintsan ashman woshosh shuketso b' meetuwok'o biango n kúp'iri etosha? <sup>11</sup> Eshe nee «Dank taane» err Krstos b'ish b' k'irtsonat b' imnetiyon kúp'eraw krstyaniyo t'afituwe etee. <sup>12</sup> Hank'on amants it eshuwotsi dadar bo nib maawtso gaawiyon Krstosi it dadiri. <sup>13</sup> Eshe misho t eshu amantsosh t'ug b' wotitka wotiyal t eshush t'ug wot k'azosh b' jamon meetso maaratse.

## 9

### *Wosheetswots mebtiyo*

<sup>1</sup> Taa nas' keshk taanosha? Taa wosheets taanalneya? Taa doonzon Iyesusi be'atsta? Itwere doonzon t fini oot' itnalneya? <sup>2</sup> Doonzon wosheets t wottsok'o kitsit mahatabo it it-wottsotse k'oshuwotssh dab wosheets woto tk'azal itshere arikon wosh na'a taane.

<sup>3</sup> «Wosheets woti mebtiyo deshatsne» err keewituwotssh ti aanitwo haniye, <sup>4</sup> No mishonat úshon daatsi mebtiyo deshatsnowa? <sup>5</sup> K'osh wosheetskok'o doonzon eshúwotšk'o P'et'rosotšk'o krstiyani máátsu de'e gúrosh mebtiyo deshatsnowa? <sup>6</sup> Wee finar beyo b́ geyit taanat Barnabas s'uzsheya? <sup>7</sup> Demozalo b́ took gizon kes'fo kone? Woyiniyo tohr b́ shuwo maarawo kone? Gizi s'eeno jinr b́ezo úyawo kone?

<sup>8</sup> Han t keewir ash asaabiyok'oneya? Nemonu hank'o eratsa? <sup>9</sup> «Mááy sirbiru minz beero b́ noono tipk'aye» ett nemotse guut'ere, eshe Ik'o hank'o b́et minz beruwotssh shiyanatneya? <sup>10</sup> Ik'o han b́et noosh shiyanatniyosha? Gosh goshiruwo jángát b́ goshiruwok'o, mááy bútsirwo jángát b́ bútsiruwotse, hank'on jamo b́ bano b́ daatsituwok'o, han arikon b́ guut'e no jangoshe. <sup>11</sup> Noo shayiri keewo itsh no shookori wotiyal it meets deero itoke no k'es'al een keeweya b́ wotiti? <sup>12</sup> K'oshwots keewan itoke daatso boosh geyife wotiyal eshe no haniyere bogo daatso aawuk'oneya noosh geyiyo b́ k'azeti? Nooyere mebtiyann t'ak'ameratsone, no Krstosko doo shishiyosh t'ug b́woterawok'o jam keewo k'ama nok'amri bako mebtiyan t'ak'ameratsone. <sup>13</sup> Ik' mootse finiruwots bo misho Ik' mootsne bodatsituwok'o wosh t'inetseyiru t'arap'ezoke finirwitsu wosh manatse kayide'er bometwok'o danatsteya? <sup>14</sup> Mank'o doo shishiyo daniru-

wotsu bometuwo fin manatse bo daatsituwok'o Ik'o azazere.

<sup>15</sup> Taamó mebtiyanotsitsere ikunoru t'ak'ameratse, hanowre t guut' t mebtiyan eegishe taash koteyo b k'azi? Etaatniyaliye, asho bín t ít'iruwu datsmec'ron b oriyoniyere k'iro taash k'anefe. <sup>16</sup> Doo shishiyo daniyo taash geyik b wottotse t it'et keewo aaliye dab doo shishiyan daniyo tk'azal indowe taana! <sup>17</sup> Doo shishi keew angnon b woterawo t shunon tdaniruwosh k'awutso detsfe, angnona t finiri wotiyalomó taash imetsmani ti fini bako k'osh tk'alts keewo fa'ee etaliye. <sup>18</sup> Eshe t maawiruwosh t k'awuntso eebi? T maawi k'awntso doo shishwo daniyir daats taash geyituwo t de'aawo doo shishi fino damozalo hank'on t finoniye.

<sup>19</sup> Taa konshor guuts twoterawo nas' ash taane, wotowa ére t faltsok'on aywotsi kashiyir boon t'akamosha etaat jamosh gutso wotere.

<sup>20</sup> Ayhudyotston t wotor ayhudyotsi kashiyosh ayhudyotsk'o twoti, taa nemi shirots woto t k'azalor dab nemi shirotstsuwotsi kashiyosha etaat nemi shirotse beyiru ashuwotsk'o t woti.

<sup>21</sup> Taa Ik' nemo detstsonat Krstos nemi shirots t wotiyaloru dab nem deshaw Ik' ash woterawotsi kashiyosha etaat nem deshaw ashok'o twoti.

<sup>22</sup> Bo imnetiyon maawtsuwotsi kashiyosha etaat maawtsuwotskok'o maawk t woti, t faltsok'on muk'uwotsi kashiyosh jamonton jam keewo t woti.

<sup>23</sup> Jaman t k'alir dooshishiko deero kayosh dooshiyosha etaatniye. <sup>24</sup> Wos'i nokorewor jametso bwos'fook'o boyitsnowere ik s'uzo

shlmatiyo bdek'fook'o danatsteya? Mansh itwoor shlmatiyo dek'osh woc'ere. <sup>25</sup> Wos'on noheyiru jamwots maawfetsr anaanshr dano woshfne, bo mank'o bomaawir beshituwo t'afitwonat andish wotitu akliliyo daatsoshe, noomó nomaawir t'afraawonat dúre dúrik wotts akliliyo daatsoshe. <sup>26</sup> Taamó am b bodooko danawu ashokok'o datsmec'ro woc'atse, jongo kisho t'umde'er jot'iruwok'o datsmec'ro shoótetk taanaliye. <sup>27</sup> Mansh k'oshuwotsi nohewo maants s'eetk'riyakon taa t tookon nohemanitse úr wotaarr tdaatserawok'o tiatso korde'er taash bíazazetuwok'o woshituwe.

## 10

### *Woteraw ik'uwotsi ik'iyo bgeyirawok'owo*

<sup>1</sup> Tieshuwotso! Nonihots daawno bo abaatse wotdek't boon b jishfere bteshok'o jametswots aatsk'ar biro bokimtsok'o itsh gawiyo geefe. <sup>2</sup> Musenton ikwotoshat daawnanat aats k'aranits bogupeyi. <sup>3</sup> Únetswotsu ik naari shayiri mishman máárne, bo únetswere Shayiri úshman úshrnee, <sup>4</sup> Únetswotswor iknaari shayiri úshe boushi, bo úshtsonwere boon shoyidek't sha'efetst teshts shayiri s'almanitse t'úúp'ke btesh, s'almanuwere btookon Krstosiye bteshi. <sup>5</sup> Man bwoteferor ayuwotsn Ik'o genee'úweratse, mansh bo duuno woruwots juweyat boori. <sup>6</sup> Bo gond keewo botewntsok'o noowere gond keewo notewunrawok'o jaman noosh ats kotiyosh

**10:1** 10:1 Kesh. 13:21-22; 14:22-29      **10:3** 10:3 Kesh. 16:35

**10:4** 10:4 Kesh. 17:6; Taaw. 25:1-18      **10:5** 10:5 Taaw. 14:29-30

**10:6** 10:6 Taaw. 11:14

ariyetso wotere. <sup>7</sup> «Ashuwots móónat úshosh beebodek'i, weeralonowere duubosh botuwi» ett bo jangosh guut'etsok'on, bo woteraw Ik'o bo ik'itsok'o it were bokok'o woteraw ik'uwotsi Ik'i k'ayere. <sup>8</sup> Boyitsere ik ikuwots widi morro bofintsok'o noowere widi morro finonowa? Bo han bok'altsotse boyitse hiye keez kum ashuwots ik aawon k'irrne. <sup>9</sup> Boyitsi ik ikuwots fadt dawunzoon shaas'eyat bok'irtsok'o noowere Krstosi fadk'ayone. <sup>10</sup> Boyitse ik ikuwots mumundat úd'iru melakiyon bot'aftsok'o itwere mumund k'ayere.

<sup>11</sup> Keew jaman boats b́bod noosh no ats kotiyosh ariyeyi, guut'ewwere dúri s'uwaatse fa'úwotssh noosh dano b́wotishe. <sup>12</sup> Eshe need'iruwok'o ariru asho b́ dihrawok'o bí atso korde'e. <sup>13</sup> Ashaats bodiru fadewoniyere k'osh fadewo itats boratse, Ik'o amaneke, it angoniyere bog wotts fadewo it ats b́ bodetuwok'o eekeratse, it fadeworo b́n it k'amit ango imr fademanitse it keshet weero itsh k'anitwe.

<sup>14</sup> Mansh eshe shuneetswotso! woteraw ik'uwotsi ik'iyatse wokoore. <sup>15</sup> Hanowre itsh t'iwintsirwotsi itwottsotsne, hansh taa tkeewirwo it itokon aab angshuwere. <sup>16</sup> Noo Ik'o udat nokayirwo deerets úshi wanc'o Krstos s'atsonton ik woto detsfoshna? Notitsiru mishonwere Krstos meentsenton ik woto detsfoshna? <sup>17</sup> Meeyiru mishman ik b́wottsotse noowere ikánatse kayiruwotsi nowottsotse aywotsi nowotiyalor ik ats noone.

18 Aab Israe'el ashaashwots bok'altso s'iilere, tiiniru woshó meyiruwots woshó t'intseyiru t'arap'ezonton ikwoto deshatsnowa boteshi?

19 Eshe hank'o t etor woshosh t'intsets meetso wotk keewa eteya tieti? Himó woteraw Ik'o wotk keewa etya tieti?

20 Mank'owiyaliye! Ik' ash woterawwots woshó bot'ntsir Ik'osh b woterawo fo'erawwotsse, eshe it fo'erawwotsnton ik woto itdetsetuwok'o geeratse, 21 Doonzo úshi wanc'o úyifetsr aani fo'erawwots úshi wanc'o úsho falatste, doonzo mishi maratats kayefetsr fo'erawwots mishi maratse kayiruwotsi woto falatste, 22 Eshe hank'o k'alr doonzo okoriwonowa? No bíyere bogo kúp'efnwa?

23 Jam keewo baziye kaliye, ernmó jam keewo t'ak'amitkaliye, jam keewo baziye kaliye, ernmó jam keewo agetkaliye. 24 Asho ik ikon k'oshuwotssh b sheengetwok'owa bako b took t'k'miyo geek'aye.

25 It nibots tuwiru amank'azo okjuk'rar gawuy-atse kemeyiru meetso eega eega iterawon moore.

26 «Datsunat biitse fa'a jamo Doonzoke.»

27 Krstiyani woteraw ashó iti móósh bs'eegal móósh iti bs'eegtsmanok itametka wotiyal itsh t'inetu mish jamo it tookotse tuwit amank'azjamo okjuk'rar eega eega iterawon moore. 28 Ernmo ash iko «Meetsan woteraw ik'osh shukeeke» bietal ash man han b keewtsonat nibo bdantsotse meetsman maak'ayere. 29 Niba ti etorowere ashó niboni eta bako it niboniyaliye tietiriye.



Bére s'ayin twoto k'osh ash nibats bíangshiir eegoshe? <sup>30</sup> Taa Ik'o údefetśr tmáal Ik'o bín túdiru keewatse tuutson eegoshe taan k'ooreti?

<sup>31</sup> Eshe it moor wotowa it úshor wotowa jamkeewo it k'alor jamkeewo Ik' mangosh k'alwere. <sup>32</sup> Ayhudiwotsi wotowá, Ik' ash woterawwotsi wotowá, Ik'i moonor b'wotiyal, kon shoor t'ug wotk'ayere. <sup>33</sup> Taa jametsuwots bokashituwok'o jametswotssh bshengisha bako ttookosh bsheengetuwok'o tgeerawotse, ash jamo tk'aliru k'alon tgene'úshiruwok'o itwoor mank'o k'aluwere.

## 11

<sup>1</sup> Taa Krstosi tiartsok'o itwere taan areore.

*Ik' Ik'iyi niwo*

<sup>2</sup> Jam aawo taan it gawirwonat itsh t imts dano kúp'idek'at dets itdek'tsotse, itn údiruwe. <sup>3</sup> Ernmó nungush jami tooko Krstosi, mááts tooko nungusho, Krstos tokonwere Ik'o niho b'wottsok'o it danetwok'o shunfee. <sup>4</sup> Tooko p'urdek't Ik' k'oniruwó wee bek'i aap'o keewiru nungush jamo b' tookoniye bketiyiri. <sup>5</sup> Mank'owere btooko p'ur bde'awon Ik' k'oniru wee bek'i aap'o keewiru máátsu b tookoniye bketiri, btooko p'ureraw máátsu bs'ageetsok'owe btaaweti. <sup>6</sup> Máátsu b tooko p'ureratsane wotiyal b took s'iuro k'ut'ewiye, ernmó btook s'iuro k'ut'ewo wee s'ageyo bin ketit keewa wotiyal b tooko p'urowiye. <sup>7</sup> Nungusho Ik'o ariyetsonat Ik' mango bín b' be'etk' b' wottsotse b' tooko

p'uro geyiratse, máátsunmó nungushi mangiye. <sup>8</sup> Máátsuni nungushatse daatseyi bako nungusho máátsatse daatseratse. <sup>9</sup> Mank'were máátsu nungushosha bi azeeyi bako nungusho máátsush azeratse <sup>10</sup> Hanatse tutsonat melakiwots shinatse alishirootse bfa'ok'o kitsitwo, p'uro b tookats gerde'iyee. <sup>11</sup> Doonzoke no detsts beyon máátsu nungushalo beratsane, nungushonu máátsalo beeratse. <sup>12</sup> Máátsu nungushatse b datetsok'o nungushonu b shuwet máátsatsne, ernmó nungusha wotowa mááts wotowa k'osh jamkeewonu Ik'okne b daatseti.

<sup>13</sup> Aab it tookon anghsuwere, máátsu btooko b p'urerawo Ik'o k'ono bish wotituwa? <sup>14</sup> Nungusho b took s'iuro bgenziyal bish keeti mit b wotok'o hank'on azeyon danekosha? <sup>15</sup> Máátsunmó bish took s'iuro ime btooko bín ipbdek'etuwok'o bwottstotse btook s'iuro bgeenziyal bish bmangee. <sup>16</sup> Han jangatse moosh geyiru asho fa'ewotiyal noon wotowa Ik'i maa k'oshuwots wotowa hank'o doyo deshatsone.

*Doonzo kooc'i mishi jango*

*(Mat. 26:26-29; Mar. 14:22-25; Luk'. 22:14-20)*

<sup>17</sup> It ko'ewor it k'aliruwo gonda bako sheeng keew bwoterawotse and itsh ti imiru dananatse iti úderatse. <sup>18</sup> Jamoniyere shino ikwotdek'at it kakuwewor it dagotse k'osh k'oshewo bbeyo shishre, t shishts keewonwere badoo ko arik bwottstok'o amaniruwe. <sup>19</sup> Ar keewetsuwots konotsi bowottstok'o galeyar bodanetwok'o ititse

k'osh k'oshewo b̄beyo jinatse. <sup>20</sup> Ikok it kakuwe-wor it meeyir doonzo kooc'i mishaliye. <sup>21</sup> It móór iko iko b̄ korááwo bíyaailye b̄meyiri, mank'oon iko b̄ k'ak'efere iko mashe b̄mashiri. <sup>22</sup> Eshe it meetuwoknat it úshet moo deshasteya? Himó Ik' moone it gac'iri? Himó eegoru bo meetu deshawwotsne it jiitsiri? Eshe eege itsh tieteti? Keewansh iten údota? B̄ jamon úderatse!

<sup>23</sup> Doonzoke t dekt'sonat itsh tbeshits dano haniye, doonzo besheyat b̄ imewots t'ú manots misho k'aúbdek'i, <sup>24</sup> Ik'o b̄ údiyakon tiitsdek't, «[nahere móóre,] han itsh wotituwo tiaatsoniye, han taan b̄n itgawitwo wosh de'ere» bíeti <sup>25</sup> Mank'o kooc' mishoniye il úshi wanc'o k'aaúdek't «Úshi wanc'an t s'atson finet handr taaroniye, jam aawo han itúshor b̄n taan gawosh wosh de'ere» bí eti.

<sup>26</sup> Mishan itmooronat úshi wanc'an it úshor jam aawo doonzo b̄ wafetsosh b̄ k'iro keewitute. <sup>27</sup> Konuworu asho b̄ish wot geyirawo doonzo tusho b̄ móónat doonzo úshi wanc'an b̄ úshal doonzo atsonat s'atso k'awunts bí ats wotituwe. <sup>28</sup> Eshe konworu asho tushan b̄ mooniyere shi-nonat wanc'an b̄ úshoneyere shino b̄ tooko shú s'iilo b̄ish geyife. <sup>29</sup> Asho konworu doonzo atso eeg b̄ wotok'o galde'er b̄ dananiyere doonzo tusho b̄ maal doonzo úshi wanc'o b̄ úshal b̄ tookats angshe b̄ doweti. <sup>30</sup> It dagotsere ayuwots bomawutsonat boshodu ik ikuwotsu bok'iriye han jangatsne. <sup>31</sup> Noo notokats angshrone wotink'e no ats angsherawunk'ee b̄teshi.

<sup>32</sup> Ernmó il datsunton noats angsherawok'o and angshiru doonzo noon b́ seziri.

<sup>33</sup> Eshe t eshuwotso! Doonzo kooc' mishosh it ko'eyor it ats atseyo korewere. <sup>34</sup> It ko'ewo angshosh b́ woterawok'o ititse k'ak'ts asho b́ beyal b́ meyitse moowe. Oorts keewosh taa manok twoor dabr b́n jiishetwo itsh imetuwe.

## 12

### *S'ayin shayiri imuwotsi*

<sup>1</sup> Ti eshuwotso! ando S'ayin shayiro b́met imuwotsi it dano geefe. <sup>2</sup> Ik'i ash woterawwotsi it teshor it danaw keewwotso jisheyat noon keew falraw woteraw ik'uwots maants iti daamefok'o danfte. <sup>3</sup> Mansh Ik'i shayiron jisheyar Iyesusi c'ashetuwo konwor aaliye, mank'owere S'ayin shayiron jisheyarni bako «Iyesus doonzel!» etetuwo konworu b́ aalok'o itsh keewituwe.

<sup>4</sup> K'osh k'osh S'ayin shayiri imuwots fa'ane, S'ayin shayironmó ike. <sup>5</sup> K'osh k'osh finuwots fa'ane, doonzonmó ike. <sup>6</sup> K'osh k'osh fini naaruwots fa'ane, ernmó jamo b́jamon finituwo ik Ik'oniye. <sup>7</sup> No ik iketsitse S'ayin shayiro be'eyat b́ finirye jametsi t'k'miyoshe. <sup>8</sup> S'ayin shayiro ik ashosh dani teleefi aap'o imetuwe, k'osh ashoshwere shayirman dani aap'o b́ imeti, <sup>9</sup> Ik shayirman ikosh imnetiyo b́ imeti, k'oshoshmó shodets kashiyit imo b́ imeti, <sup>10</sup> Ikosho Ik'oke bek'on keewo, ikoshowere Shayirwotsi galde dano, ikosho k'osh naari noon keewo, k'oshoshwere imets k'osh noonon keewtso bits falo b́ imeti, <sup>11</sup> Wotowa'ere jamán

k'alituwo ik shayirmaniyē, S'ayin shayiro b́ shunok'o ik ik ashosh k'osh k'osh imo b́ imeti.

*Ik ash atsatse k'osh k'osh atsi kaywots bobeyok'o*

<sup>12</sup> Ash iko ayi atsi kayuwotsi detsfe, b́ atsi kaywots ayi bowotefere bobeyir ik ash manatse. Hank'o Krstos ayi atsi kaywotsi detsts ik atsi kayok'owiye. <sup>13</sup> Ayhudi nowotiyalo Grik ash nowotiyalo, guutswotsi nowotiyalo, S'ayinwotsi nowotiyalor, ik ats wotosh ik shayiri S'ayinon gu-uperoone, nouñetswor shayir ikanitse úshrone.

<sup>14</sup> Ik atso b́fine ay atsi kaywotsatsna bako ik atsi kayo s'uzatsnaliye! <sup>15</sup> Tufo «Taa kish woto tk'aztsotse atsi kay taanaliye!» b́etal eshe hank'o b́iettsosh atsi kay b́woto oorituwa? <sup>16</sup> Waazonuwere «Taa ááw woto tk'aztsotse atsi kay taanaliye» b́etal, eshe, hank'o b́iettsosh atsi kay b́woto oorituwa? <sup>17</sup> Ats iko b́ jamon ááw b́wotink'ere eegneya shisho b́faliyank'oni? Ats iko b́ jamon waaz b́ wotink'ere eegneya shink'o b́faliti? <sup>18</sup> Andmó Ik'o b́ shunok'o ik ik atsi kayo atstotse b́ish wotit beyokok b́beyoko deshde'er b́datseetuwo'k'o woshre. <sup>19</sup> Bouñetswor ik kayo s'uzi bowotink'ere ats jamo eewkneya b́ datseeyank'oni? <sup>20</sup> Andomó ay atsi kaywots bobeyalor atso ik s'uzee.

<sup>21</sup> Aawo kishosh «Nee taash geyiratsne!» etosh falratse, tookonuwere tufosh «Nee taash geyiratsne!» etosh falratse, <sup>22</sup> Da'bnuwor b́itsi maawkwotsi araat be'eyiru atsi kaywots iki bogshdek't geyiknee. <sup>23</sup> Mangi muk' detstswotsi araat

noosh be'eyiru atsi kayuwots iki bog mango boosh imetuwone, bek'osh jitsik araat noosh be'eyiru atsi kaywotssh iki bog mango imaat boon nokotiriye, <sup>24</sup> Bek'osh sheengiru atsi kaywotsmó jaman boosh geyiratse, Ik'onmó s'ilosh jitsitu araat be'eyiru atsi kayuwotssh bog mango bo detsetwok'o woshdek't atsi kayuwotsi gonkire. <sup>25</sup> Hanowere bk'al atsi kaywots dagotse k'osh k'osheyalo bo ats atseyo bogawetuwok'owe. <sup>26</sup> Ik atsi kayo b kic'iyal k'osh atsi kaywotsuwere jamon bintoniye bo kic'iti, ik atsi kayonu mango b daatsor k'osh atsi kaywotswere binton ikn bo geneúwiti.

<sup>27</sup> It Krstos atsi kayi itne, it ik ikon bíatsi kay itne. <sup>28</sup> Mansh Ik'o ik ik asho Ik' mootse k'osh k'osh fino bodetsetuwok'o woshre, hank'on shino woshetswotsi, gitlo nebiyatiyotsi, kezlon danirwotsi naashire. Dabtnuwere adits finituwotsi, dabt shodtso kashiyo boosh imetswotsi, ashuwotsi t'ep'o boosh imetswotsi, jiishiruwotsnat k'osh k'osh noonon keewiru ashuwotsi woshre. <sup>29</sup> Jamwots wosheetswotsneya? Jamwots nebiyatiyotsneya? Jamwots danirwotsneya? Jamwots adits finirwotsneya? <sup>30</sup> Jamwots shodts kashiyo boosh imeknowa? Jamwots handr noonon keewo falfnowa? Jamwots handr noonon keewetso biitso falfnowa? <sup>31</sup> Eshe ayidek't bogf imo daatsosh gewoore.

Dab and jamoniyere bog weerindo itsh kit-suna.

## 13

*Ari shuno*

<sup>1</sup> Taa ashuwots noon keewon wee melakiwots handr noonon keewo falr shuno deshatsé wotiyal kuhiru biri wee cicilru bilbilyo twotoniye. <sup>2</sup> Bek'on keewi imo tdetsalor aashts jamo tdanalor, danjamo tdetsalor, guro beyokere k'osh beyok beshit imnetiyi jamo t detsal shuno deshatsé wotiyal taash eegor k'aatse. <sup>3</sup> T detsts jamo t'owwotssh t kayiyal, dab tiatso b́ oori-raniyere b́n it'osha err,\* beshide'er ti imal, shuno t t'ut'al eegoru taash k'alatse.

<sup>4</sup> Shuno k'ame b́ k'amefoni, shuno sheenge b́ k'alfoni, shuno okoorrake, shuno bog taana erake, shuno id'ake, <sup>5</sup> Shuno niwalo finerake, shuno b́ took jang mec'ro geerake, shuno nibo k'unake, shuno b́n dadeyaloru dadman dadok'o taawakee, <sup>6</sup> Shuno ar wotts keewatsa b́ geneúiti bako kááw woterawonton geneúwerakee, <sup>7</sup> Shuno jamo falituwe, jamono amanituwe, b́ jangituwere jamoniye, jam keewon kúp'e b́wotiti.

<sup>8</sup> Shuno b́ jamon dihiratse, bek'on keewo imets imo beshituwe handr noonon keew faló beshituwe, dan wotiyaloweré beshituwe. <sup>9</sup> No danon wotowa bek'on no keewitwo k'atsoniye. <sup>10</sup> Ernmó s'een wottso b́woor k'atso ooritke.

<sup>11</sup> Na'a t wotor na'ok'owa t keewufo, na'ok'owa t gawfo, nana'ok'owa t maramarefni, gan asho t wotoromó nana'i doy jamo k'aztk'iri. <sup>12</sup> And mestawut shuwa shuwa etir mastawit gondotse s'ilirwotskok'o noone, bíyormó shin shinaatsne

---

**13:2** 13:2 Mat. 17:20; 21:21; Mar. 11:23 \* **13:3** 13:3 Branitsi ik ik mas'afotse «It'osha» etfne.

nobek'eti, and tdanir k'atsoniye, bíyoromó Ik'o taan b́ dantsok'osh s'een dano detsetwe.

<sup>13</sup> Eshe imnetiyo, jángo, shuno, keezanots oorar betknee, ernmó hanotsitsere bogetuwo shune.

## 14

### *Andr noonon keewo imetsok'o*

<sup>1</sup> Eshe shuno daatsosh gewoore, S'ayin shayiri imuwotsitse dab bitsnor bek'on keewo kup'arr gewoore. <sup>2</sup> Andr noonon noon keewitwo Ik'osha bako ashoshaliye b́keewiri, ááshk wotts keewo S'ayin shayiri angon b́ keewirwosh b́ keewirman danetuwo aaliye. <sup>3</sup> Bek'on keewitwonmó k'osho agosh, kup'iyonat atskup'iyosha ashuwotssh keewituwe. <sup>4</sup> Andr noon keewon keewit asho b́ took mec'roniye biagiriye, bek'on keewirwonmó Ik' moo agetwe.

<sup>5</sup> No jamets andr noon keewon it keewo shunfee b́ teshi, bogshde'er t shunetuwonmó bek'on it keewink'ere, Ik' maa ashuwotsi agosh andr noon keewon keewetso biitsetuwo bí alitka wotiyal, andr noon keewiru ashoniyere bek'on keewiru asho bogfe. <sup>6</sup> Eshe t eshuwotso! itok twoor andr noonon keewon keewufere t weyi wotink'ere eebi itsh t k'aliyank'oni? Bogo itsh t k'alitiye Ik'oke ááshtso kitson wee danon wee bek'on keewon wee dano itsh deshde'er twaale.

<sup>7</sup> Turarok'onat T'imbok'o kash deshaw duubi k'ac'uwots k'osh jááwi k'ááro bo t'ut'al bo imiru duubi k'ááro awuk'o b́ wotok'o aawuk'oneya b́ daneti? <sup>8</sup> Ezbedo daneraw k'ááron b́ fugeyal, kes'osh kone k'aniti? <sup>9</sup> Mank'owere it be'ets andr noonon keewetsman it keewor it dants



noon keewon keewo it k'azal it keewirwo kone danosh faliti? Jongosh keewirwok'owe it wotiti. <sup>10</sup> Datsanatsere ay naari noon keewwots fa'ane bits deshaw noon keewo aaliye. <sup>11</sup> Taash keeweyiru noon keewi biitso danatse wotiyal keewiru ash mansh ibee t wotiti, biwere taash ibee b wotiti. <sup>12</sup> It S'ayin shayiri imuwotsi kup'shdek'at it geyiruwosh, bogshde'er geyo itn bgeyyit Ik' maa ashuwots bin bokup'it imuwots boayituwok'owe.

<sup>13</sup> Andr noon keewiru asho b keewirwo biitso b falituwok'o Ik'o k'onuwe. <sup>14</sup> Andr noon keewon Ik'o t k'oniyal t shayirona Ik'o tk'oniri bako t nibo shuwalke b wotiti. <sup>15</sup> Bere eeg t k'ale taan b geyiyiti? T shayiron Ik'o k'onituwe, t nibon dab Ik'o k'onituwe, t shayirono Ik'osh dubetuwe, t nibon Ik'osh dubetuwe <sup>16</sup> Hank'o woto b k'azal nee shayiron Ik'o n udor, nee ni etiruwo danawu asho n udonat ni Ik' k'onosh «Amen» eto aawuk'oneya b faliti? <sup>17</sup> Arikon nee nt'iintstso udon Ik'o k'ono sheengetskee, ernmo ash k'osho bin kup'eratse.

<sup>18</sup> Taa it uneetsiyere bogo handr noonon keewirwo twottsosh Ik'o udirwe. <sup>19</sup> Ernmó k'oshuwotsi daniyosha err Ik' mootse tats kum aap'uwotsi handr noonon keewoniye úts aap'uwotsi ttookon keewo shunfee.

<sup>20</sup> T eshuwwotso! gond keewosh nana'i marmat'ok'o wotoore bako it asaabiyon nan'i marmat'uwotskok'o wotk'ayere, maniyere it asaabiyon katstswotsi wotoore. <sup>21</sup> Manuwere, «Handr noonon keewiru ashuwotsnat

Bo noon keew keewo daneraw ashuwots  
 noonon ash ashaanotssh keewitwe,  
 Mank'o b'wotiyalor taan k'ewatsne etfe  
 Doonzo Ik'oni»  
 ett nemoots guut'ere.

<sup>22</sup> Hansh andr noon keew keewon keewo mi-  
 likit b'wotit amaneraw ashuwotssh bako amaniru  
 ashuwotsshaliye, bek'on keewets keewo kee-  
 wonmó milikit b'wotit amaniru ashuwotssha  
 bako amaneraw ashuwotsshaliye.

<sup>23</sup> Krstiyaniwots bokakuwewor Ik' maa ashu-  
 wots andr noon keew keewon b' keewor  
 danawwots wee amaneraw ashuwots bowaal  
 keewirwotssh «Ashaanots geeniya bowutsi»  
 etaalknowa? <sup>24</sup> Ernmó ik iko bek'on bo keewiyal  
 amanerawo wee danaw asho b'waal b'hsishts  
 keew jamon b'ish shiyeetuwe, wee jamon b'iyats  
 angshituwe. <sup>25</sup> B' nibots ááshts keewo keer  
 be'etuwe, b' baronowere gup' gup'dek't «Arikon  
 Ik'o itdagootse!» eton Ik'osh b'sagaditi.

*Ik wotdek't Ik'o k'oneewor beyosh bín geyit  
 niwo*

<sup>26</sup> Eshuwwotso! eshe eeg k'alo geyifa? Ik'  
 k'onosh it kakuwewor ititse iko Ik'osh du-  
 ubo detsfe, k'oshonu daniyo detsfe, k'oshonu  
 ááshts keewo kish kitso detsfe, iko ando andr  
 noonon keewo detsfe, ikonu keewetsman bi-  
 itso detsfe. Eshe, jaman krstiyaniwotsi agetk  
 woto b'ingeyife. <sup>27</sup> Andr noon keewwotsi  
 keewirwots bobeyal git bor wee b' ayiyal keez  
 wotde'er keewne, bo bokeewirwono k'osh asho  
 biishe. <sup>28</sup> Keewetsman biitsiru asho b'íaalitka  
 wotiyalmó andr noonon keewirwo kakweets-  
 manotsitse s'k eree, b'tookonat Ik'osh keewwe.

<sup>29</sup> Bek'on keewitu gito wee keez wotar keewitunee, k'oshuwotsmó keewetsman k'ewude t'iwintsde s'iilne. <sup>30</sup> Ko'eyat beyirwotsitse k'osh asho ik jago b bek'al, shini keewiru man s'k err beewe. <sup>31</sup> Ik ikuwots bo danetuwok'onat bo kup'ituwok'o it jamets taron Ik' wosho keewo falfte. <sup>32</sup> Nebiyiwots bek'i shayiro nebiyyotssh keewetuwe. <sup>33</sup> Jeeni Ik'o Izar Izeweri bako fayi Ik'o Izar Izeweriyaliye. S'ayin Ik'i maa ash jamotse k'alefok'o, <sup>34</sup> máátswots Ik' maa ashuwotsitse s'k erne. Nemonmó bí etir bo boaletwok'owa bako bo alititwok'o eekeratse. <sup>35</sup> Ik ik keewo danosh bo geyiyal bo kenih kenih bo meyitse aatune, Ik' k'onosh ko'eyor máátsuwots bo keewo jiitsike.

<sup>36</sup> Beree Ik' aap'o b waa itokneya? Himó Ik' aap'o b waa itok mec'ree? <sup>37</sup> «Taa nebiyi taane wee taa Shayiron imetso detsfe» eteet asho b beyal t guut'tsan doonzo tzaziyo b wotok'o dande'e. <sup>38</sup> Han danawo b beyal bíwere danek'aye.

<sup>39</sup> Eshe t eshuwotso! bek'on keewosh kup'ar gewoore, andr noon keewono bazik'ayere.

<sup>40</sup> Ernmó jam keewo niwonat matson wotowe.

## 15

### *Krstos k'irotsé btuutsok'o*

<sup>1</sup> Eshe ando t eshuwotso! itsh tdan-its doo shishi aap'o itsh gawiwo geefe, doo shishy aap'onwere it dek'tsonat kup'dek'at bíyats it needirwoniye. <sup>2</sup> Taa itsh tdaniitso doo shishi aap'o kup'ide'er desh it dek'ink'ere bín

kashiyank'te, maniyere okoonmó it amantso datsmec'roone.

<sup>3</sup> Taa t dek'ts shintso jamoniyere bogo itsh beshire, itsh tbeshits keewonwere S'ayin mas'aafotse guut'etsok'on Krstos no morrosh k'irre, <sup>4</sup> duukere, S'ayin mas'aafotse guut'etsok'onowere keezl aawots k'irotsé tuure etke. <sup>5</sup> Bí P'et'rossh be'ere, ilowere tatse git woshetswotssh be'ere, <sup>6</sup> Úts bal ashuwotsiyere bogts bshuuts shoydek't sha'iruwotssh iknoto be'ere, boyitse ayuwots andish bborfetsosh fa'ane, ik ikuwotsmó k'irrne. <sup>7</sup> Maniye hakonowere Yak'obsh be'ere, wosheets jamwotssho be'ere.

<sup>8</sup> Jami s'uwaatsnowere shabetsok'o wottsoosh taash ando be'ere. <sup>9</sup> Taa Ik'i moo gishtso twottsoose wosheets jamwotseite dashonat wosheka err s'eegeyo taash geyirawo taane. <sup>10</sup> Ernmó taa and twottso wotat tdaatseyir Ik'i s'aatonee, taashowere imets s'aato shuwalon ooreratse, dabnuwor k'oshuwotsiyere bogo finon mawure, ernmó han k'alirwo taanton fa'a Ik'i s'aatoni bako taanaliye. <sup>11</sup> Eshe taan wotowa boon wotowa nodaniyrwo haniye, itwere itamantso haniye.

### *Ashuwots k'irotsé tuwo*

<sup>12</sup> Krstos k'irotsé b tuutsk'owa no daniyiri wotiyalmó ititsere ik ikuwots aawk'oneya k'irotsé tuwo aaliye boetiri? <sup>13</sup> K'irotsé tuwo aali wotiyal Krstos k'irotsé tuuratse etee, <sup>14</sup> Krstos k'irotsé tuuratse wotiyal no daniruwoni wotowa it imnetiyo k'awuntso deshatsé etee, <sup>15</sup> Ik'o Krstosi

k'iroitse tizre etaat daniruwots kootets Ik'i gaw-wotsi woterone etee, eshe k'irts ashuwots k'iroitse tuwatsno wotiyal Ik'o Krstosi k'iroitse tuzatse etee. <sup>16</sup> K'irts ashuwots k'iroitse tuwatsno wotiyal Krstos k'iroitse tuwatse etee. <sup>17</sup> Krstos k'iroitse tuuratse wotiyal it imnetiyo k'awuntso deshatsé etee, andoru morrotsa it beyiri etee, <sup>18</sup> Krstosn amanat k'irtswots t'afrneé etee, <sup>19</sup> Krstosi no-jangir datsanatsi be mec'rosha wotiyal ash jamoniyere bogo noosh shiyanetk nowotoniye.

<sup>20</sup> Ernmó Krstos k'irtswotssh k'iroitse tuwon k'aabo wotat arikon k'iroitse tuure. <sup>21</sup> K'iro b waa ik asho atse tuutson b wottsok'o k'iroitse tuwonu b weet ik asho atse tuutsone. <sup>22</sup> Adam atse tuutson ash jamo bk'iriruowok'o manko Krstos atse tuutson ash jamo kasho daatsituwe. <sup>23</sup> Man bwotituwere ik ikosh b tar tarone, Krstos k'iroitse tuwooke shintsoniye, ilowere Krstos bwoor bik wottsuwots k'iroitse tuwitune. <sup>24</sup> Maniyere hakowere bialguronat alona ang jamo t'afir mengsto Ik'o Nihosh beshide b ímet aawo dúri s'uwoniyé b wotiti. <sup>25</sup> Ik'o b balangar jamwotsi bí ali shirots b woshfetsosh Krstos b naasho geyiyituwe. <sup>26</sup> Da'eyar s'uwatse t'afitu t'elato k'ironiye. <sup>27</sup> «Ik'o jam keewo bí ali shirots woshk'rere» ettso guut'ere, maniyé daneke, ernmó «Jam keewo bí ali shirots wotere» bíetor jam keewo bí ali shirots woshts Ik'o nihono dabaatse <sup>28</sup> Jam keewo Krstos ali shirots b wotiyakon Ik'o niho jámo bjámon b wotituwok'o naayo b tookon jam keewo bí ali shirots woshtso Ik'o niho shirots wotitwe.

29 Eshe k'irts ashuwots tuwatsno wotiyal k'irts ashuwots jangosh gupeyiru jamwots eebi bo'ot'oni? k'irts ashuwots b́ jamon k'irotsé tuuratsno wotiyal ashuwots boshegro eegosha etniya bo gupeyiri? 30 Noo nowotiyaloru aaw aawon t'up' er tawootse nobeyir eegoshe? 31 T eshuwotso! taa aaw aawuon k'iro taan b́ datsiri, hanowere t keewir doonzo Iyesus Krstos jangosh itatse t detsts it'o arik b́wottsotsne. 32 Ash asaabiyok'on taa Efesonn dini s'ootswotsnton t kaare eeg orshoshe? K'irtswots k'irotsé tuuratsno wotiyal «Yaats nok'iritwotse woore moone, úyone» eteetsok'oyiye.

33 Dáshek'ayere, «Woteraw tooho sheeng doyoniyé bí awashifoni.» 34 It nibo maants aanoore, morro fink'ayere, ititsere ik ikuwots Ik' danawwots fa'ane. Hano ti etiri it jitsitwok'wa etaatiye.

### *K'irotsé tuuts atso*

35 Asho iko «K'irts ashuwots aawk'oneya botuwit? k'irotsé bo tuwor bodetset atso awuk'one?» err aato falitwe, 36 Nee dogono n shokiru mááyo b́ k'irrawo boc'r beyo falatse, 37 Nee n shokor Geshi shooko wee k'osh mááyi shooko s'uzi n shooketi bako ili bos'et miti gindoniyaliye. 38 Ik'onmó shook mansh b́ shuntsok'o miti gindo b́ imeti, ik ik shookosh k'osh k'osh miti gindo b́ imeti.

39 Meets jamo ik naaraliye, ash meetso ik naare, gizi meetso k'osh naare, Kafuwots meetso k'osh naare, Mus' meets k'osh naare.

<sup>40</sup> Mank'o daritsi atso fa'ee, datsatsi atsonu fa'ee, ernmó daratsi atsi mango ik naare, datsatsi atsi mangonu k'osh naare. <sup>41</sup> Aawi mango ik naare, Ashitsi mangonuwere k'osh naare, K'enuwots mangonu k'osh naare, ik k'eenno k'osh k'eenoniyere k'osh mango detsfe.

<sup>42</sup> K'iroitse tuwit ashuwots jango haniye bíari, t'afitu k'irts atso wotat shooketso k'irawu beetk atso wotar tuwituwe. <sup>43</sup> Ketoon shooketso mangon tuwitwe, maawon shooketso kúp'on tuwituwe, <sup>44</sup> Meetsi ats wotat shooketso shayiri atso wotar tuwituwe. Meetsi atso b́ beyok' shayiri atsonuwere fa'ee. <sup>45</sup> Mansh, «Shints asho Adam kashets azeetso b́ woti» ett guut'ere, iltso Adam Krstosmó kash imet shayiro b́ woti. <sup>46</sup> Ernmó shintso b́ waa meetsonne bako shayironaliye, shayiron wottso b́waa meetson wottsoniyere ile. <sup>47</sup> Shints asho Adam bí azee shawatse b́ wottsosh datsatsike, gitl ashonmó b́waa daratsnee. <sup>48</sup> Datsats wottswots datsatse azeets ashok'one, daaratse wottsuwots daaratse waats ashok'one. <sup>49</sup> Datsatsi asho aro noartsok'o daratsi asho aronowere aritwone.

<sup>50</sup> Eshuwotso! itsh tkeewirwo haniye, meetsonat s'atson Ik'i mengsto naaratse, mankowere k'irr t'afit atso t'afrawu kashets atso naaratse.

<sup>51</sup> Eshe! mist'iri iko itsh keewirwe. Noo nouñetswor k'irratsonne. Ernmó no únets wonetuwone. <sup>52</sup> Nowoneetwonwone s'uwatse ezbedo fugewor ááwi k'iluowok'o iknotone. Ezbedo fugetuwe, k'irts ashuwotswere t'afraw kashetswotsi wotar tuwitune, noowere wonetuwone, <sup>53</sup> T'afituhan t'afrawo k'irituhanwere

k'irrawo tahdek'o b'ish geyituwe. <sup>54</sup> T'afituwaan t'afrawo k'iritwanwere k'irrawo tah b'dek'or «K'iro da'ewon k'oot'ewtsere!» ett guut'etso s'eenetwe. <sup>55</sup> Mank'owere,

«K'irono! b'ín nkoshetuwo aawoke b'fa'oni?

K'irono! ash b'ín n t'afit ango ewuke?» etetuwe.

<sup>56</sup> K'iro b'ín b'koshet ango morre, morri angonuwere neme. <sup>57</sup> Ernmó nodoonz Iyesus Krstos weeron da'o noosh imetuwosh Ik'osh údo wotowe!

<sup>58</sup> Eshe mansha shuneets eshuwotso! kup'ar need'ore, ik keewonor shek'ek'ayere, doonzo finosh it shaatso datsmec'r b'woterawok'o dande'er, it eed'irawo jam aawo doonzo fino finosh kup'ore.

## 16

*Iyerusalemitsi fa'a amantsuwotssh kakuwets tep'i gizo*

<sup>1</sup> Amantsuwotssh giz kishi jango Gelatitsi Ik' moosh t imts b'ín bojisheeyirwok'on it were mank'o k'alwere. <sup>2</sup> Taa twoor giz kishera-wok'o ik ik gawiyotsi sanbat eenots ititsi ik iko b'datsiruwok'on kishde'er beezwe. <sup>3</sup> Taa itok twoor, amoosh falitúne it etts ashuwots it kishts gizo de'er Iyerusalem maants boametuwo'k'o b'ín bodeenet dabdabeyonton boon woshituwe. <sup>4</sup> Taa tiamo b' geyitka wotiyalo, taanton ametúne.

*P'awlos finosh b'gawuts finwotsi*

<sup>5</sup> Mek'odoniiweeron amoosh t etirwotse manweeron t beshoor iki it weeron weetwe.



6 Tiametu jamok tweerosh taash wotit tep'o taash it woshituwok'o daneraka itok teshetwe, daneraka jooshonor itnton beshiyosh falituwe,  
7 And tbeshor iki bweeron itn s'iilo geeratse, doonzontoh bwotiyal muk'i geenzts gizeyosh itnton teshosh geyirwe.

8 Ernmó P'ent'ek'ost'eyi bali aawo bborfetsosh Efesonitse teshetwe. 9 Ayi eenonat shuu detsts fin fengesho taash k'eshewutsere, k'efirwotsu aynee.

10 Timotiwos itok bwoor shatalon itnton bbeetuwok'o bin tewu'ere, biwere tikok'o doonzo fino finiruwe. 11 Mansh konwor bin bgac'eraawok'owa, bi eshwwotsnton t maants bweetuwok'o tkotirwotse tiyok jeenon aanar bweetuwok'o bweerosh bin geyitwon bin tewu'ere.

12 No eshu Ap'los k'osh eshwwotsnton it b s'iiletwok'o kup'shdek'at k'onre bteshi, bimó and it maants wosh ekeratse, bish bk'anoor weetwe.

### *S'uwaatsi izonat jamon*

13 Maaw k'ayere, it amantsok'on kup'arr need'ore, kup'ore, aawo shuu'ere. 14 It k'aliru jamo shunon k'aluwere.

15 Ti eshwotso! Ist'ifanos maa ashuwots Akayiy datsatse amants shintswotsi bowottsok'onat amantsuwotssh finoshowere botoko beshidek't boimtsok'owo danfte. 16 Hanotsk'o ashuwotsnat bontonwere finon maawiru jamwotssh it aletwok'o kup'idek'at it baterawok'o gawirwe.

17 Ist'ifanosna, Ferdonat's Akayik'oswere t maants bo waatsotse gene'owere, it tiyoke daatsewo itk'aztsotse bo it shegro taash shaptso s'eentsrne. 18 Bo t shayironat it shayiron kashirne, mansh hanotsk'o ashuwotsi dande'ere.

19 Isiyon fa'a Ik'i moowwots jamo itsh t'intsirune, Ak'ilnat K'irisp'iln, bomootse kakuweyiru krstiyani jamwotswere bo nibon jamo doonzo shúútson itsh t'intsirúne.

20 Hanoke fa'a krstiyani jamwots jamo itsh t'intsirune, S'ayints joobewon jamó it atsatseswosh aatewere.

21 Taa P'awlos jamáán t kishon itsh guut're.

22 Doonzo shunawo bbeyal c'ashek wotowe!  
No doonzo wowe!

23 No doonz Iyesus s'aato itnton wotowe.

24 T shuno Iyesus Krstosn it únetsnton wotowe.

**Handr Taara**  
**The New Testament in the Borna Language of**  
**Ethiopia (Handr Taara)**

copyright © 2018 The Word for the World International

Language: Borni (Borna)

Contributor: The Word for the World Southern Africa

**Handr Taara**

The New Testament in Borna in Latin version

The Word for the World

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 8 Apr 2023

cb58eacd-0521-532d-8a14-a3dd0daa6412